

**FUAFUAGA TATAU MO LE VA'AIA LELEI O  
I'A MA FIGOTA**

**O LE AFIO'AGA O**

**SAMATAU**

**ASO 18 Aokuso 1998**

**SAUNIA:**

Pule mamalu a Alii ma Faipule ma tagatanuu o le Afioaga o Samatau ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

## **FAASOLOGA**

<b>1. Upu Tomua</b>	<b>3</b>
<b>2. Autu</b>	<b>3</b>
<b>3. Ituaiga Faigafaiva taatele</b>	<b>3</b>
<b>4. Tapenaga o Ienei Tusi Taiala</b>	<b>3</b>
4.1. Feiloaiga muamua ma le uluai fono ma le afioaga	<b>3</b>
4.2. Faatalatalanoaga ma vaega ta'itasi o le afioaga	<b>3</b>
4.3. Komiti Faufautua o le faasao	<b>4</b>
4.4. Pasiaina o le Tusi Taiala	<b>4</b>
4.5. Filifiliga o le Komiti mo le Mataituina ma le Faamalosia o Tulafono	<b>4</b>
<b>5. Fuafuaga Faataatitia</b>	<b>4</b>
5.1 Faamalosia tulafono faa-le-nuu e faasaina ai faigafaiva le talafeagai e pei o fanaia, ava-niukini ma vailaau oona.	<b>4</b>
5.2 la faasaina le lafoai o lapisi i le sami ma le matafaga	<b>5</b>
5.3 la taofia faigafaiva mai isi afioaga	<b>6</b>
5.4 la faasaina ona toe fagotaina i'a ma figota laiti	<b>6</b>
5.5 la aoina ma uta alamea ma faatamaia ai	<b>6</b>
5.6 la faasaina upega ma tili mataninii	<b>7</b>
5.7 la faasaina tuiga ma faamoa	<b>7</b>
5.8 la faasalalauina tulafono a le afioaga	<b>8</b>
5.9 la unaia faigafaiva i tuaau ma aoaoga mo faafaigafaiva.	<b>8</b>
5.10 la faasaoina ma faateleina amu.	<b>9</b>
5.11 Ogasami faasaoina	<b>9</b>
5.12 Tufaina atu ma le faafaatoagaina o i'a ma figota	<b>10</b>
<b>6. Toe iloiloina o Ienei Fuafuaga tatau.</b>	<b>10</b>
<b>7. Talosaga</b>	<b>10</b>
<b>8. Faamatalaga faaopopo e uiga i le afioaga</b>	<b>11</b>
8.1 Faamatalaga o Samatau	<b>11</b>
8.2 Ituaiga Faigafaiva	<b>11</b>
8.3 I'a ma Figota	<b>12</b>

## **1. UPU TOMUA**

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i nuu ma afioaga i tua. I le tele o afioaga, latou te le o faatauaina le vaaia lelei o le tamaoaiga ma le siosiomaga o le gataifale. O le aumaia ma le faaaogaina o ituaiga faigafaiva faa-onapo-nei e i ai mea manava, upega ma tili mataninii, ma vailaau oona e faamata faigofie ai ma tele i'a maua ae o loo faatamaia ai le siosiomaga o le gataifale ma ona tamaoaiga. O le faatinoina foi o atinae i luga o le gataifale ua faaleagaina ai le tele o nofoaga ma le miliona o meaola o le gataifale.

O le polokalame o le faasoina o le gataifale na amata mai e le ofisa o faigafaiva i le tausaga 1995. O le faamoemoe o le polodalame ina ia toe tapue mai le tamaoaiga o le gataifale ma puipuia ai le siosiomaga.

O taualumaga o le polokalame e aofia ai le soalaupuleina ma le fausiaina o se Tusi Taiala. O lenei Tusi Taiala o loo tamauina ai fuafuaga faataatitia a le afioaga ma le ofisa o faigafaiva. O nei fuafuaga faataatitia e unaia ai le pulea lelei ma fuafua tatau o le faaaogaina o le tamaoaiga o Tafatafa ma Matavai.

## **2. AUTU**

O le autu lenei sa faatalalanoaina ma malilie autasi i ai vaega taitasi o le afioaga;

- |  |
|--|
| <ol style="list-style-type: none"><li><b>1. Ina ia puipuia le siosiomaga o le gataifale ma,</b></li><li>2. Toe faatupulaia le tamaoaiga o le gataifale mo tupulaga o le lumana'i</li></ol> |
|--|

## **3. ITUAIGA FAIGAFIVA TAATELE**

E tele ituaiga faigafaiva e mafai ona faatinoina i le aloalo o le afioaga o Samatau. O nisi o nei ituaiga faigafaiva e i ai matatao, uua malau (toso), ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga.

O le faatinoina o faigafaiva-le-talafeagai e i ai fanaia, ava-niu-kini ma vailaau oona ua matua faasaina lava i lalo o le pulega mamalu a Alii ma Faipule. E tutusa lelei lava ma le faaaogaina o tane mauulu ma mea manava (scuba gears) i fagotaga ua matua faasaina lava ona toe faatinoina i gataifale o le afioaga.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge ma alogo, anae ma mataleele sa tele ma faigofie ona maua i le 30 tausaga talu ai. E oo foi i figota e i ai le sisi, faisua faapea sea, loli, mamao ma fugafuga sa tele i aso ua mavae. I le taimi nei, o nei i'a ma figota ua pau maualalo le faitau aofai ma e tele ni itula e faaaluina mo fagotaga faatoa maua se meaai mo le aiga, pea faatusatusa i le 30 tausaga ua mavae.

## **4. TAPENAGA O LENEI TUSI TAIALA**

O lenei tapenaga sa saunia lava e alii ma faipule ma tagatanuu o Samatau faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia ua taua i lalo.

### **4.1 Feiloaiga Muamua ma le Afioaga.**

I le amataga mai o le polokalame, sa faapea ona faatoai mai se finagalo o le Pule Mamalu a Alii ma Faipule i le Ofisa o Faigafaiva e faailoa ai lo latou fiafia e auai i le Polokalame mo le Puipuia o Gataifale. O le feiloaiga muamua sa faafesootai e le susuga i a Apulu Sefo Fonoti i le Aso 29 Iuni 1998. O le aso 24 o Iulai 1998 sa tauaofia ai le uluai fonu a sui o le Ofisa ma le Afioaga o mo le faamalalamaina ma le taliaina o le polokalame.

#### **4.2 Faatalatalanoaga i Vaega e tolu.**

O le taua o leni faatalatalanoaga ina ia vaevaeina le afioaga i vaega e iai matai, tina ma aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo aliaie mai le siosiomaga o le gataifale o Samatau. Sa faapea foi ona sailia ai ma ni aafiaga ma ni mafuaaga o nei faafitauli. O ni fofo, faatinoga ma i latou e faatinoina nei fofo sa faailoa mai.

#### **4.3 Komiti Faufautua o le Faasao:**

O le matafaioi a le komiti faufautua o le tuu-faatasia lea o faamaumauga ma faamatalaga mai vaega taitasi ma sa mafai ai ona latou tapenaina se ata faataitai o le Tusi Taiala.

#### **4.4 Pasiaina o le Tusi Taiala.**

O le faagasologa atoa o nei fuafuaga fa'aatitia a le afioaga e aofia ai foi ma fuafuaga fa'ata'atitia e lagolagosua mai ai le ofisa o faigafaiva.

O leni Tusi Taiala sa tuuina aloaia i le fonu a matai e sui o le komiti faufautua ma sui o le ofisa o faigafaiva mo le pasiaina ma amata faatino ai loa galuega ma matafaioi a vaega taitasi. O le fonu foi lea e filifilia ai loa ma le 'Komiti o le Faasao' e taitaia le faagaioiga o fuafuaga ua uma ona fa'ata'atitia.

#### **4.5 Filifilia o le Komiti o le Faasao**

O le komiti o le faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. E maea loa le pasiaina o le Tusi Taiala o le a faafesootai lava le ofisa ma le komiti i tulaga uma lava e manaomia ai le fesoasoani e pei ona autasi ma tamauina i le Taiala.

### **5. FUAFUAGA FAATAATITIA**

O fuafuaga faataatitia o ni gaioiga ua faamoemoe e faia ina ia foia ai faafitauli ua faaalua ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona ta'ua o ;

- Fuafuaga faataatitia a le nuu.

O le isi vaega o fuafuaga faataatitia o le ofisa o faigafaiva ma o nei fuafuaga o le tuuina atu o fuafuaga ma fesoasoani ini nisi auala e pei o aoaoga ma le tufatufaina o pepa o faamatalaga i mataupu e fesootai i le gataifale. O galuega uma lava e faatinoina e le ofisa o faigafaiva e ao ona faamaonia e le faatonu lagolago (Assistant Chief Executive Officer) a le matagaluega o faatoaga ma faigafaiva.

I taimi o faatalatalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga o le faaititia lea o i'a ma figota i le aloalo ma aau o le afioaga o Samatau.

O mafuaaga ma o latou aafiaga i le siosiomaga o le gataifale sa faapea ona iloiloaina ma sailia. O tali o faafitauli ma fofo poo auala e foia ai na iloiloaina foi i faatalatalanoaga. E le gata i lea sa faailoa mai ai foi ma vaega latou te faatinoina nei galuega.

O le vaega i lalo o le a auiliiliina atu ai atoatoa fuafuaga fa'ata'atitia sa aoina mai i vaega taitasi ma tuu faatasia e le komiti faufautua ma le lagolagosua a le ofisa o faigafaiva.

**Tulafono Autu Tau Faigafaiva (1988) :** O le tulafono a le Malo o Samoa e ;

- (1) Faasaina o Faigafaiva-le-Talafeagai,
- (2) Faamalosia ai le Laiseneina o Vaa-Fagota.

**Tulafono Faatonutonu Mo Le Laiti Faatapulaaina mo I'a ma Figota (1995) :** O le tulafono lea e faatapulaaina ai le laiti o i'a ma figota, ma le fuaina o mata-upega.

**Tulafono Laiti :** O tulafono a le nuu ma afioaga ua amanaiaina e le Faamasinoga.

## **5.1 FAAMALOSIA TULAFONO FAA-LE-NUU E FAASAINA AI FAIGAFAlVA-LE TALAFEAGAI E PEI O FANAIA, AVA NIUKINI MA VAILAAU OONA.**

### ***Otootoga***

Na faaalua e vaega taitasi i taimi o faatalatalanoaga o loo faaauuina pea le faaaogaina e faifaiva o fanaia, ava niu kini ma vailaa u oona i fagotaga. O nei faigafalva-le-talafeagai ua mautinoa lo latou tulaga ogaoga i le faatamaiaina o le siosiomaga o le gataifale, e pei o ia laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auala faa-faigafalva e umi ma tele se taimi e toe faafoi ai i le lelei sa i ai.

### ***Fuafuaga faataatitia a le afioaga***

Talu ai ona o le tulaga pagatia ua iai le gataifale o lenei nuu o Samatau o lea na ae ai se finagalo autasi i le komiti faufautua ina ia matua faamalosia tulafono a le afioaga e faasaina ai faigafalva-le-talafeagai e pei o fanaia, ava-niu-kini ma vailaa u oona. O le puipuiga ma le faamamaluina o nei tulafono o le a i aao lava o le pule mamalu a ali'i ma faipule faatasi ai ma le lagolagosua a tagata nuu o le afioaga.

### ***Fautaga***

la toe faamalosia ma faamamaluina tulafono ua taua i lalo a le afioaga mo le faasaina o faigafalva le talafeagai.

### ***Tulafono***

*Mo le mamalu o le atunuu atoa ai ma tagatanuu o Samatau:*

*Ua matua faasaina faigafalva-le-talafeagai e pei o fanaia, ava-niu-kini ma vailaa u oona ona toe faatinoina i gataifale o le afioaga o Samatau.*

### ***Faasalaga***

*Mo tagata o le afioaga e solia lenei tulafono, o le a faasalaina i le 5 aumatua poo le \$300.000, afai o le a le utagia mai nei faasalaga, o le a molia sao i le tulafono a le Malo.*

*O tagata mai isi afioaga o le a molia sao i le Tulafono Autu Tau Faigafalva ma le Tulafono Laiti a le ofisa o faigafalva.*

### ***Fuafuaga faataatitia a le ofisa o faigafalva***

O le a fesoasoani le ofisa i le tufatufaina o pepa o faamatalaga i faigafalva-le-talafeagai aemaise ai o le faatinoina lea o suesuega ma moliaga o tagata ua faamaonia lona faatinoina o nei faigafalva i le faamasinoga a le Malo o Samoa.

## **5.2 IA FAASAINA LE TOE LAFOAI O LAPISI I LE SAMI MA LE MATAFAGA**

### ***Otootoga***

O lapisi lafoai i le sami ma le matafaga e avea ma ala e faamanualia ai pe lavevea ai aao o le aufaifaiva. E le o se vaaiga matagofie o loo iai le matafaga ma le siosiomaga o le gataifale i le taimi nei, ma ua avea ma tulaga e faaitiitia ai tagata tafafao mai e afea le afioaga. E le gata i lea o le faaleagaina ai o le siosiomaga o le gataifale ma faatamaia ai o nofoaga mo meaola o le sami.

### ***Fuafuaga faataatitia a le afioaga***

O le a faamalosia e le afioaga le faasaina ai ona toe lafoai lapisi i le matafaga ma le sami ae saunia ni galuega mo le afioaga atoa e faamama ai lapisi, e pei o le fausiaina o fatalapisi po o le eliina o se lua e lafoai i ai.

### ***Tulafono***

Ua matua faasaina ona toe lafoai lapisi otaota ma lapisi e pei o pepa iila, uamea, atigi apa ma isi mea faapena i le sami o Samatau.

### ***Faasalaga***

*Mo tagata o le afioaga e solia lenei tulafono, o le a faasalaina i le \$100.*

*O tagata mai isi afioaga o le a molia i le Tulafono Laititi a le afioaga e faasaina ai le lafoai o lapisi i le gataifale ma le matafaga.*

***Fuafuaga faataatitia a le ofisa***

O faamatalaga eseese e faatatau i aafiaga o le gataifale ma ona tamaoaiga o le a fesoasoani atu iai le ofisa e ao-tauina ai le afioaga i le taua o le teumaluina o lapisi ma otaota i nofoaga talafeagai.

**5.3 IA TAOFIA FAIGAFAlVA MAI ISI AFIOAGA**

***Otootoga***

Ua maitauina le toatele o tagata mai isi afioaga ua latou fagotaina gataifale o le afioaga o Samatau. Ua le gata i lea, ua latou faatamaia foi le gataifale i ni auala le talafeagai ma ua utiuti ai le tamaoaiga e maua mai aloalo o lo o faalagoalga iai le afioaga.

***Fuafuaga faataatitia a le afioaga***

Ua faaalua mai e le Komiti le tatau ona faia os e tulafono e faasaina ai nei faigafalva le talafeagai. O le autu moni o leei tulafono ona o ei faigafalva mai isi afioaga o loo aumaia faigafalva le talafeagai ma faatinoina i lo latou gataifale ma faaleagaina ai.

Ua i ai se fuafuaga a le afioaga o le a faia se tulafono e faasaina ai tagata mai isi afioaga ona fagotaina o latou gataifale.

***Tulafono***

*Ua matua faasaina lava tagata mai isi afioaga ona toe fagotaina gataifale o Samatau e aunoa ma se silafia poo se feutagaiga ma le pule mamalu a alii ma faipule i le tolu aso ao lumanai se faiva.*

***Faasalaga***

*O le solia o lea tulafono e molia ai le na faatinoina i le Tulafono Laititi o faigafalva a le afioaga.*

***Fuafuaga faataatitia a le ofisa***

O le a lagolagosua le ofisa i le suesueuina ma le faatinoina o moliaga o le ua soli-tulafono i le faamasinoga a le Malo o Samoa.

**5.4 IA FAASAINA ONA TOE FAGOTAINA IA MA FIGOTA LAITI**

***Otootoga***

O le tele o afioaga ua latou faaalua mai le toatele o faifaiva latou te fagotaina mai i'a ma figota laiti. O le mafuaaga lea ua vave faaitiitia ai i'a ma figota, ona ua le maua se avanoa e tautuufua ma fanafanau ai nei meaola.

***Fuafuaga faataatitia a le afioaga***

Ua i ai le fuafuaga a le afioaga o le a lagolagoina le tulafono o faigafalva mo le lapopoa faatapulaina e fagotaina ai i'a ma figota.

***Tulafono***

*Ua matua faasaina ona toe fagotaina i'a ma figota laiti mai le gataifale o Samatau, o loo malu puipuia i le Tulafono a le Malo ma le Polokalame Faasao .*

***Faasalaga***

*O le a faasalaina i le \$500.00 soo se tagata o le afioaga e solia lenei tulafono a le usitaia o le molia i le tulafono a le malo.*

*O tagata mai isi nuu e le usitaia lenei tulafono o le a molia sao i le tulafono a le Malo.*

***Fuafuaga a le Ofisa o Faigafalva***

O le a fesoasoani le ofisa mo le tapenaina o tulafono laiti e faasaina ai le fagotaina o i'a ma figota e laiti ifo nai lo le fua faatapulaa o i'a ma figota aemaise pepa o faamatalaga e faamalamalama ai le puipuiga o le fagotaina o i'a ma figota laiti.

## **5.5 IA AOINA MAI UTA ALAMEA MA FAATAMAIA AI**

### ***Otootoga***

O le alamea o se meaola o le ituaiga o le aveau ma e nofo i luga o le aau. O lenei meaola e na te aiina meaola niniua ua taua o POLIPE o loo tutupu mai ai amu. A oo ina faateleina le alamea o le a faapena ona latou faatamaiaina se vaega tele o le aau ma avea ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faa-umatia le alamea i le vaevaeina o lona tino i le sami aua e mafai e nei itu tino ona faatupuina mai ai nisi alamea.

pau le auala e mafai ona tapeina ai lenei meaola o le aoina mai lea i uta i le pau matu e faamagoina ai pe tanuina foi. E mafai ona faaogaina lenei meaola o se faalelei eleele mo faatoaga ma mea toto.

### ***Fuafuaga faataatitia a le afioaga***

Ua faailoa mai e le afioaga o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta mo le faatamaiaina o lenei meaola faalafua.

### ***Fautuaga***

Ua fautuaina e le komiti faufautua o le aoina mai i uta o le alamea, o le a faatinoina lava lea e tagatanuu o le afioaga. O le faatinoina o lenei fuafuaga o le a aoina tai-ono masina alamea ma aumai i le pau-matu e faatamaia ai ma faaogaina ai mo le faalelei eleele.

### ***Fuafuaga faataatitia a le ofisa***

E leai se polokalame a le Malo ua fuafuaina e totonu ai le faatamaiaina o lenei meaola vagana ai ni fautuaga e fesoasoani atu ai le ofisa i auala talafeagai e tineia lenei meaola faalafua e ala atu i Pepa o faamatalaga ua maea ona saunia ma o le a tufatufaina atu.

## **5.6 IA FAASAINA UPEGA MA TILI MATANINII**

### ***Otootoga***

O le faaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua pe a faaauaina pea nei ituaiga faigafaiva. O le a oo ina faaitiitia i'a ma figota e mafai ona oo atu lo latou lapopoa e maua ai le avanoa e fanafanau ma tautuufua ai.

### ***Fuafuaga faataatitia a le afioaga***

Ua faailoa mai e le komiti o le faaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaogaina i fagotaga i le gataifale o le afioaga. Ua faapea foi ona faaalua mai e le afioaga lo latou matua lagolagoina o le Tulafono Faatonutonu o Faigafaiva a le Malo ua i ai nei mo le faatapulaaina o mataupega ma tili.

### ***Tulafono***

Ua matua faasaina lava ona toe fagotaina upega tatao e i lalo ifo o le 2 inisi (50 mm) lona mataupega faapea foi ma tili ia le i lalo ifo o le 1.2 inisi (30 mm) i gataifale o Samatau.

### ***Faasalaga***

O soo se tagata o le afio'aga e solia lenei tulafono o le a faasalaina i le \$500.00. a le usitaia o le a molia i le tulaono a le Malo

Mo tagata mai isi afioaga o le a molia ma faasalaina i le tulafono faatonutonu o faigafaiva a le Malo o Samoa.

### ***Fuafuaga faataatitia a le ofisa***

O le lagolagosua mai a le ofisa o faigafaiva e ala i lana polokalame fesoasoani, o le tuuina atu lea o faamatalaga e saga faamautuina ma faamaopoopoina ai lenei tulafono.

### **5.7 IA FAASAINA TUIGA MA FAAMO'A.**

#### ***Otootoga***

O amu ua maitauina lona taua i le siosiomaga o le gataifale ona ua mautinoa ua avea lea ma nofoaga o figota ma i'a faapea ma isi meaola o le sami. Afai o le a faatamaiaina amu o lona uiga, ua afaina foi le tele o meaola o loo nonofo ai. O tu'iga poo fa'amo'a o se tasi lea o faigafaiva e le talafeagai ua matua faaleagaina ai amu aemaise i'a ma figota laiti. Afai ae faaauuina pea nei ituaiga faigafaiva o lona uiga o le a sili atu ona tele se afaina o amu o loo fai ma ofaga ma nofoaga o i'a ma figota o le gataifale.

#### ***Fuafuaga faataatitia a le Afio'aga***

Na faaalua e vaega taitasi o le Afio'aga e ui lava Ina le toe vaaia leni ituaiga o faigafaiva, peitai e tatau lava ona faia se tulafono e faasaina ai tu'iga ma fa'amo'a i gataifale o Samatau. O nei manatu faaalua sa matua lagolagoina e le komiti ma aiaia ai loa le tulafono e pei ona taua i lalo:

#### ***Tulafono:***

*Ua matua faasaina ona toe faatinoina tu'iga ma fa'amo'a i gataifale o Samatau*

#### ***Faasalaga:***

*O tagata o le afioaga e solia leni tulafono o le a faasalaina i le 5 aumatua poo le \$500.00, pe afai ae le utagia leni faasalaga o le a molia loa i le tulafono a le malo*

*O tagata mai isi afioaga o le a molia i le tulafono a le Malo.*

#### ***Fuafuaga faataatitia a le Ofisa o Faigafaiva.***

O le a fesoasoani le Vaega o Faigafaiva mo le faamautuina ma le faamallosia o leni tulafono. O le a mafai foi ona tuuina atu ni pepa o faamatalaga e uiga i mea uma ua taua. E lagolagoina foi e le Ofisa soo se fuafuaga a le Afio'aga ua talafeagai lelei ma le tulafono mo le faasaoina o amu.

### **5.8 IA FAASALALAUINA TULAFONO A LE AFIOAGA**

O faasalalauga i leitio, televise ma nusipepa o nisi ia o auala talafeagai lelei e momoli atu ai ni feau taua aemaise ai o le faalateleina o ni fuafuaga ua saunia. E le gata ilea, o le a silafia ai e le mamalu o le atunuu, malamalama ma manino lelei i le aotelega o le faatauina, ma le malu puipuia o le siosiomaga o le gataifale o le afioaga.

#### ***Fuafuaga faataatitia a le Afio'aga***

Ua faaalua mai e le komiti le taua ole faasalalauina o tulafono a le afioaga ua faamoemoe ma faagaga mo le puipuia o le siosiomaga o le gataifale ma ona tamaoaiga. O le komiti o le a latou faamaopoopoina aemaise le le tapenaina o faasalalauga e faatatau i tulafono e puipuia ai le siosiomaga o le gataifale ma le vaaia lelei o i'a ma figota.

#### **Autu o le Faasalalauga "Puipuia o le Gataifale o Samatau Falelatai"**

#### ***Fuafuaga faataatitia a le ofisa o faigafaiva***

O tulafono uma a le afioaga mo le puipuia o le gataifale e tatau ona sainia e le Faatonusili o le Matagaluega o Faatoaga, ma Faigafaiva le Susuga i a Seumanutafa Ioakopo Malaki. Ina ia mafai ona avea ai ma tulafono laiti o Faigafaiva (by-laws). O faasalalauga o nei tulafono o le a gafa lea ma le Ofisa o Faigafaiva.

### **5.9 IA UNAIA FAIGAFAlVA I TUAUU MA AOAOGA MO FAIGAFAlVA.**

#### ***Otootoga***

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina. Pe afai ae faaitiitia le fagotaina o nei vaega o le gataifale, ia poo le unaia o tulaga tau faigafaiva i tuauu ma aau mamao.

#### ***Fuafuaga Faataatitia a le Afioaga***

Ua manatu le Komiti, e ao ona unaia ma faamallosia faigafaiva i tuauu ma aau mamao ina ia tuumamaina ai le fagotaina o i'a ma figota o le aau ma le aloalo. Ua le gata foi i lea ae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale, aemaise i le aloalo, ua faaleagaina. Ua talosagaina foi le Ofisa o Faigafaiva ina ia faatinoina se aoaoga i auala tau faigafaiva e aooina ai le autautai o le nuu ma ia faatautaia e se Alii Ofisa o Faigafaiva ua i ai se tomai faapitoa i mea tau faigafaiva.



### ***Fuafuaga Faataatitia a le Ofisa o Faafaigafaiva***

Talu ai ona o le tele o nuu e leai ni vaa e talafeagai mo fagotaga i tuaau, o lea ua taumafai ai le Ofisa e saili ni fesoasoani mo le faafaigofieina o le mauaina o ni vaa talafeagai mo lea faamoemoe. O le a iloiloina foi e le Ofisa o Faigafaiva manaoga i auala tau faigafaiva e ao ona fesoasoani ai e aoaoina ai le mamalu o le autautai o le afioaga. O itu taua o le a aafia i nei aoaoga e peo o le teuina ma le vaia lelei o i'a, saogalemu i luga o le sami, tausiga o afi vaa, faasuina o i'a, ma isi lava mataupu taua.

### **Faamatalaga Faaopoopo**

***Vaa mo fagotaga i tuaau:*** O le leai o ni vaa talafeagai mo fagotaga i tuaau o le ala lea ua avea ma vaegase i le unia o faigafaiva i tuaau. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai, ua filifilia ai le vaa e i le va o le 14-16 futu, o lona tau e \$9,800, tuufaatasi i ai ma loa afi (15 HP) ma nai mea fagota, o le taula, ofu faaola mo le saogalemu i luga o le sami, ma foe. O loo i ai se fesoasoani a le Faalapotopotoga a le Iuni a Europa (EU) mo le faatupeina o le 65% o le tau atoa o le vaa (\$9,800), o le 35%, o le sao lea o se afioaga poo se faalapotopotoga ua auai i le polokalame a le Vaega o Faigafaiva.

O lenei ituaiga vaa e mafai ona faaaauvaaina e i tagata se toalua pe toatolu foi, ma e mafai ona faaaogian lenei vaa i faigafaiva i tuaau. O le a faia foi ni aoaoga mo le saogalemu i luga o le sami, teuina ma le vaia lelei o i'a, tausiga o vaa atoa ai ma faiga o mea fagota.

## **5.10 IA FAASAOINA MA FAATELEINA AMU.**

### **Otootoga**

O le puipuia ma le faasaoina o amu, o se tasi lea o auala ua mafai ona toe tutupu ma ola ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo faalagolago mo meaai ma o latou nofoaga. O le faia o se ogasami faasaoina ma le taofia o fiagafaiva le talafeagai o nisi ia o fuafuaga tatau ma le talafeagai mo le faateleina o amu.

### **Fuafuaga Faataatitia a le Afioaga.**

Ua faaalua e le Komiti, o le faia o se ogasami faasaoina o se auala lea ua mautinoa ua mafai ona fasao ma faateleina ai amu. O lenei faasao o le a faatinoina e le Komiti faapea ai ma le Pule mamalu a Alii ma Faipule. O le vaia lelei ma le mataituina o lenei faasao o le a feagai lea ma tagatanuu o le afioaga.

### **Fuafuaga faataatitia a le Ofisa o Faigafaiva.**

O le a fesoasoani le Ofisa i le faamalamalamaina o itu lelei o le faasaoina o amu. O le a galulue faatasi le Ofisa o Faigafaiva ma le afioaga i le faatinoina o se suesuega i se vaega o le gataifale o le a faaagagamo le faasao.

## **5.11 OGASAMI FAASAOINA**

### **Otootoga**

O se vaega o le gataifale ua faasaoina e tatau ona le toe aafia ai ni faigafaiva. O le avea o se vaega o le gataifale ma nofoaga faasao, e mafai ona malu puipuia ai le siosiomaga o le gataifale ma ona tamaoiga i figota ma i'a aemaise o amu. O lenei nofoaga faasao o le a faasaoina ai amu, 'aau, figota faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota e mafai ai ona toe faaleleia nisi vaega o le gataifale ua afaina. E le gata i lea o le a fanafanau ma tautuufua i'a ma figota o loo aumau i le nofoaga faasaoina ma tafea atu o latou fua fanau ma faatupuina ai nisi meaola fou i nofoaga ua le maua ai nei i'a ma figota. O le a le pine ona manuia ai i tatou ae faapea foi tupulaga o le lumanai.

### **Fuafuaga faataatitia a le Afio'aga**

#### ***O le afio'aga e ao ona:***

- Galulue faatasi ma lagolagosua i le auaigalua a le Vaega o Faigafaiva, i le faatinoina o le iloiloaga o le tulaga talafeagai o se vaega o lona gataifale, e avea ma nofoaga faasaoina.
- Talanoaina ma auiliiliina le lipoti ma ia faia se faaiuga i le faavaeina o le nofoaga faasaoina.
- Saunia faailoilo e pei o laau, pole poo nisi lava faiga talafeagai mo le faailogaina o le vaega ua faamautuina ma pasiaina.

***Afai ae finagalo le fono i se tasi, poo fuafuaga uma ua taua,***

Ia faatinoina loa fuafuaga mo le faavaeina o le nofoaga faasao e pei o le mataituina, tausiga ma le vaaia lelei o se vaega ua atofaina.

#### ***Fuafuaga Faataatitia a le Vaega o Faigafaiva***

O le Vaega o Faigafaiva o le a:

- Faatinoina le suesueina o se vaega o le gataifale e avea ma nofoaga faasaoina.
- Saunia le lipoti mo le tuuina aloaia atu i le Komiti mo le Vaaia lelei o i'a ma figota (KFVL) ma le Fono a le afio'aga.

#### ***Afai ae finagalo le fono i se tasi, poo fuafuaga uma ua taua,***

Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le vaaia o le nofoaga faasao o le gataifale o le afio'aga.

#### ***Puipuiga o le ogasami faasaoina.***

Ua tasi le tofa ma le faautaga i le pule mamalu a alii ma faipule e ala mai i le Komiti ina ia matua aloaia ma faamamaluina le tulafono e puipuia ai le vaega o le gataifale o le afioaga ua faaagaga mo le faasaoina.

#### ***Tulafono***

*Ua matua faasaina lava soo o se tagata ona faatinoina soo se ituaiga faigafaiva, pe uia foi totonu o lenei Ogasami ua faaagaga mo le Faasaoina.*

#### ***Faasalaga***

*Mo tagata o le afioaga o le a solia lenei tulafono, o le a faasalaina i le 5 aumatua poo le \$500.00, a le usitaia o le a molia loa i le tulafono a le Malo.*

*Mo tagata mai isi afioaga, o le a molia sao i le tulafono a le Malo.*

### ***5.12 TUFAINA ATU MA LE FAA-FAATOAGAINA O I'A MA FIGOTA***

O le tufaina atu, ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina o figota i se nofoaga ua saunia.

O le tufaina atu ma faa-faatoagaina, o nisi nei o atinae mo le faatupuina o figota aua le fofoga taumafa o le afioaga. O nei auala faa-atinae e moomia ai lava le galulue filiga ma le faamaoni o le afioaga ina ia ausia se taunuuga lelei. Sa faaalua mai e vaega taitasi, o nisi o figota sa maua i lo latou gataifale ua tauau ina mou atu. O nisi o nei figota ua masalomia ua le toe maua i le taimi nei. O lea ua latou faatalosagaina ai nisi o figota e faa-faatoagaina i lo latou gataifale.

#### ***Fuafuaga faataatitia a le afioaga***

Ua i ai le fuafuaga a le afioaga o le a latou mataituina ma vaaia lelei figota o le a tufaina atu mo le faa-faatoagaina i aloalo aemaise o le mautinoa lelei o lo latou saogalemu mai le faaleagaina.

#### ***Fuafuaga faataatitia a le ofisa***

O le a fesoasoani le ofisa i le tufaina atu lea o figota e faa-faatoagaina i aloalo ma iloiloina le tulaga talafeagai o le gataifale mo nei figota. O le a saunia foi ni aoaoga e faamalamalamaina ai le olaga faa-natura o nei figota aemaise o le mataituina ma le tausiga lelei.

## ***6. TOE ILOILOINA O LENEI FUAFUAGA TATAU***

### ***Otootoga***

O le toe iloiloina o lenei Fuafuaga Tatau o le Vaaia Lelei o i'a ma figota o le afio'aga e sailia ai le agai i luma o le polokalame i totonu o nuu ma afio'aga, aemaise se auiliiliga maumaututu i le tulai mai o galuega fai a le afio'aga ma le Vaega o Faigafaiva i le faataunuuna o Fuafuaga Faataatitia e pei ona taua i luga. O lenei foi iloiloiga e lipotia ai le alualu lelei ma ni faaletonu i totonu o le Polokalame talu ona faavaeina i totonu o afio'aga. E le gata i lea o ni vaega e fia faia iai ni suiga fou e pei o le toe teuteuina o tulafono ma le faamautuina o matafaioi a itu uma o le polokalame.

## Fuafuaga faataatitia a le Afio'aga ma le Ofisa o Faigafaiva

Ua i ai le maliliega a le Komiti (KFVL) a le afio'aga ma le Vaega o Faigafaiva o le a toe auiliiliina lenei Fuafuaga Tatau pe a maea le ono (6) masina talu ona pasia lenei tusi i le Fono Tele. O le a feutaga'i lava le Vaega o Faigafaiva ma le Tofi o le afio'aga ma le Komiti i se aso o le a atofaina pe a atoa le ono (6) masina.

### 7. TALOSAGA

O nei talosaga sa mafai ona faia ona tuuina mai e sui ole afioaga, sa auai i fonotaga ma le Ofisa o Faigafaiva i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti i le latou fonotaga ma le Ofisa. Pe a talafeagai, o nei talosaga o le a mafai ona iloiloina e le Ofisa o Faigafaiva mo le faataunuuna pe a maea le taliaina o lenei tusi e le Pule Mamalu a Alii ma Faipule i le Fono tele e faia i le aso 24 Aokuso 1998. O talosaga uma sa tuuina mai o loo faailoa atu i lalo.

- Ogasami faasaoina
- Faisua
- Tilapia
- Vaa fagota

Aoaoga i mea tau faigafaiva (eg) Aoaoga i le olaga faanatura o le faisua

### 8. FAAMATALAGA E UIGA I LE AFIOAGA

#### 8.1 Faamatalaga o Samatau

Faamatalaga	Aofaiga
Faitau aofai o tagata o le afioaga Aofaiga o Aoga i lenei Afioaga	1,200-1,300 Tulaga Lua Aoga Faataita
Aofaiga o Lotu i le Afioaga	EFKS Ekalesia Kerisiano Aso Fitu Katoliko Mamona
Umi o le auu o le afioaga (mita) Mamao o le auu mai le matafaga	1-2 maila 1-2 maila
Loloto (futu) o vaega e aupito sili ona loloto o le aloalo pe a pe le tai.	12-13 futu
Loloto (futu) o vaega e aupito sili ona loloto o le aloalo pe a pe le tai i taimi ae le i afaina i le afa.	12-13 futu

#### 8.2 Ituaiga Faigafaiva

Faamatalaga	Aofaiga
O le aofai o tane fagogota i le sili atu ma le tasi le aso i le vaiaso.	50
O le faitauaofai o tina faifaiva e fagogota i le sili atu ma le aso i le vaiaso.	30
O le aofaiga o tagata e fagogota i tuauu mai le tasi aso i le vaiaso.	1-5
O le aofaiga o paopao e faaaogaina mo faigafaiva i totonu o le afioaga.	30-40
O le aofaiga o alia fagogota o loo faaaoga mo faigafaiva o le afioaga.	1
E faatagaina ni tagata fagogota mai nisi alalafaga e fagogota i lo outou gataifale?	Leai

### 8.3 I'a ma Figota

Ituaiga i'a	Ituaiga faigafaiva	Taimi fa'aalu i fagotaga	
		Taimi nei	10 tausaga
Aua	Upega/Tili	30 minute	30 minute
Tifitifi	Mata/matatao	1 itula	30 minute
Mata'elele	Matau / mata	1-2 itula	10 minute
Alogo	Upega/fana matatao	30 minute	30 minute
Tuuu	Upega/faamoa	15 minute	15 minute
<b>Ituaiga figota</b>			
Alili	Lama/savali Ao	1-2 itula	2-3 minute
Aliao	Lama	1-2 itula	2-3 minute
Sea	Lama	30 minute	1-2 itula
<b>Isi Faigafaiva</b>		<b>Isi taumafa o le sami</b>	
Fagapusi	Faisua	<b>Taimi faaalu 10 tausaga ua tuanai (Hrs)</b>	
Taiffee	Ula	seasea	
Afaafaloloa (tuaau)	Pa'a	2-3 itula	
Uaua malau	Laumei	2-3 itula	
		seasea	

<b>VAEGA TAUA O LE SIOSIOMAGA MO FAIGAFIIVA.</b>		
<b><u>Vaega</u></b>	<b><u>Vaega taua (sikuea mita) Taimi nei</u></b>	<b><u>Sefulu tausaga ua tea</u></b>
Togatogo	-	-
Amu	30 maila	1-2 maila
Vaovao o le sami	10	10